

50 studenc spettacolusc!

L'é stat enaudà enstadi a Sèn Jan n auter an academich de l'Università de la jent de età de Fascia

Sozietà - Cincanta codejle, ogneun con sie inom e spartii per paisc, fajea bela parbuda en vender ai 19 de otober sul gran desch del Consei de Comun de Sèn Jan. I spetèa i scric ite al nef an academich de l'UTETD, l'Università per la jent de età e che à temp a la leta, che chest an i à arjont l bel numer toron. La maor pèrt di studenc de chesta bela scola, endrezèda dal Comun de Sèn Jan con la colaborazion de la Fondazion Franco Demarchi de Trent, i vegn apontin dal Comun de Sèn Jan: 21 en dut, spartii fora bel valif 7 da Vich, 7 da Pera e 7 da Poza. Ma riéence 10 da Cianacei, 3 da Ciampedel, 4 da Mazin, e adertura 12 da Soraga. La gran maoranza l'é femenes, ma chest an te anter duc l'é ence 5 omegn: vigni an la quotes brunes cresc. L'é n om l più de età, Federico Vian de Poch da Vich, del 1927, enveze la più joena...

per la femenes no se disc l'età, ma la é amò dalonc dai 60, l'é Annelise Vian de Bastl enciasèda a Ciampedel. Apontin Annelise Vian l'à tout sù l testamonech de referenta di studenc da Daria Pollam, che ampò la seghita a ge dèr na man, e enstadi duta does ge à dat l benvegnù ai studenc, che à tacà la leziions en mercol ai 17 de otober.

I era béleche duc en vender ai 19, per la inaudazion ofiziala del nef an academich. I se à binà da les 3 te gejia de Poza, olache don Mario Bravin à dit messa recordan la fegura de Sènt Ignazio de Antiochia che l dijea che la cognoscenza e l'amor, dessema, permet de fèr de gran robes.

Dapò te sala del Consei de Comun l salut é ruà da desvaliva autoritàdes. L'assessor a la cultura del Comun de Sèn Jan, Simone Zulian, ge à l benvegnù

coi augures per chest nef an de scola: "te chesta sala siede studenc - l'à dit - ma te la sozietà siede nesc ponc de referiment." L'era ence la assessores a la cultura de Cianacei e de Soraga: Barbara Iori ge à sport a duc i complimenc per la gaissa che i desmostra, e Sandra Bussolon se à dit stolza che l'é de neva studentes da Soraga che se à scrit ite, e l'à recordà che l'é bel a ogne età stèr ensema, se confrontèr e no se isolèr. Daria à portà ence l salut de l'assessor regionèl Giuseppe Detomas e de Laura Antonacci de la Fondazion Demarchi e dapò la ge à dat la parola a la Sorastanta de la Scola de Fascia: Mirella Florian, che canche la era assessora del Comun de Poza l'aea didà la secretèra Rita Tentori Detomas a meter sù chesta Università, l'à rejonà con gran pascion ai studenc, la ge à dit che cognoscer vèlch da nef l'é bel a ogne età, che se pel emparèr dai insegnanc, ma ence un da l'auter anter studenc, e la i à saludé duc con n gran braciacol. Daria l'à dapò fat duc i ringraziamenc a chi che deida a fèr jir inant chesta leziions: i Comuns de Fascia, l Comun general, la Provinzia de Trent, la Fondazion Demarchi, don Mario e i media. L maor batiman ampò l'é jit a Ilda Agostini, che col didament de Paola Martini la se cruzia de dut l'endrez tel Comun de Sèn Jan, e amò n auter batiman al medemo Comun, che à sport ence l gustegol marendel che à serà sù la belota festa de inaudazion. (lg)



N retrat de grop per i studenc de l'UTETD con la autoritàdes che à portà sie salut a l'inaudazion del nef an de scola.